

Sandrine Marfisi: « Ùn restavanu chè machja è ceppi brusgiati »



Sandrine Marfisi, hè stallata cum'è oleicultrice in Casta dapi u 2006.

DUCUMENTU CORSE MATIN

In u parcorsu di Sandrine Marfisi dinù, c'hè a traccia di l'incendiu tremendu ch'hà arruinatu l'Agriate in u 1992. Senza sta catastroffa, quella ch'hè oghje a presidente di u sindicatu AOP « Oliu di Corsica », ùn averia forse pussutu principià a so attività.

À l'iniziu, ùn hà chè un alivetu di dui ettari, nant'à u terrenu di l'anziana vigna familiare in Patrimoniu. Problema: pè lanciassi in quantu chè giovanu agricoltore, li ci vole omancu 6 ettari. Finalmente, in u 2006, hà a pussibilità di cumprà, in Casta - in u locu dettu « Caserce » - cinque ettari d'alivi brusgiati in u 1992. « Sopr'à locu, ùn restavanu chè ceppi,

machja è e ruvine d'un anzianu pagliaghju, s'arricorda. Ma gratusine à u passatu agriculu di i locu c'eranu terreni piani, ch'eranu ind'è i tempi piantati à granu. Dopu smachjicatu, c'aghju pussutu piante cumprade in Italia. »

Cù u maritu, chì hà a cunniscenza di l'alivi, Sandrine ci la face dinù à insità i rampolli di l'alivi brusgiati. Ciò, li permette d'intruduce d'altre varietze in l'800 arburi di u so alivetu: in più di a « ghjermana » - varietza di e piante taliana - ci si trova oramai a capanaccia, a sabina, l'aliva nera... A prima raccolta si scioglie in u 2008.

Dodici anni dopu, a sfruttazione hè più

chè avviata. Trà l'alivi di Patrimoniu è quelli di Casta, sò 3 000 litri d'oliu AOP chì sortenu, ogni annu, da u fragnu di Sandrine Marfisi è chì sò vinduti sott'à a denominazione commerciale « Aliva marina ». Una riescita economica è, attempu, umana. « Ùn hè sempre faciule di travaglià in l'Agriate ma ghjè un locu magicu, palesa l'oleicultrice. I nostri terreni sò vicinu à u mare. U fattu di travaglià in un ambiente simile ghjè quantunque un affare valorizante tantu per mè quant'è per l'imaghjina di a sfruttazione. »

P.N.